



MAITEI OÚVAPE – SALUDO.

Heta mba'e niko oime okañýva ñande hegui. Ndajahechái ha ndajaikuaái.

Ñane resatũ vaicha. Hesukrísto ñe'ẽ hína upe ñande resape'a ha ñande resapéva ani haguã ñakañy. Hendive jaguatáramo jerovia pópe, oñondive, ñande komunidápe, katujete ñasêta tapépe.

Hesukrísto oime ñane ndive, ñande apytépe, ombogue pytũmby ha ñanemoirũ.

ORACIÓN COLECTA

Tupã Ñandejára, ne Ñe'ẽ rupi remoingove porã jevýva yvypórape, rojerure ndéve, opavave ikaraiva'ekue toñembosako'i oguerohory hagua pe arete guasu Páskua oguahétavape, py'a marangatu ha rerovia añetépe.

Nde Ra'y Hesukrísto rupive, Tupã Nandejaráite, oikovéva ha ipu'akapáva nendive Espíritu Santo ñemopeteíme, yma, ko'ága ha opa aráite.

**ÑAHENDU ÑANDEJÁRAPE –
MOTIVACIÓN A LECTURAS.**

Ñandejára oiporavo Rréi Davípe oma'ẽvo ipy'a ha ikorasõ rehe, ndaha'ei ijapégui orekóva.

Salmo pe ja'e Ñandejára ha'eha upe ñane sambyhýva, oñangarekóva ñande rehe ha ñanemboguatáva tape porãre. San Pablo he'i ñandéve ñasêma haguã pytũmbýgui ha jaiko hesakã hárupi, tembiapo porã rupive.

Evangelio pe ñahendu Hesu ouha ñande resá pe'a ha ñanemboguata haguã hendive. Ha'e hína upe ohesapéva ñande rekove.

PRIMERA LECTURA:

KO'ÁGÄ ÑAHENDÚTA TUPÄ ÑANDEJÁRA ÑE'Ë SAMUEL ARANDUKA MOKÕIHÁME OÏ HÁICHA 16,1B.5B-7.10-13A

Tupã Ñandejára he'i Samuélpe:

Araka'e pevépa rerombyasýta Saúlpe? Ndaipota véima ha'e oiko Israel ruvicha guasu ramo.

Emyenyhẽ ñandyrygui ne ñandy ryrú ha tereho Jesé Belengua rógape. Aiporavóma Israel ruvicha guasurã petei kuimba'e ita'y'rakuéra apytépe.

Ha'ekuéra oguahẽvo Samuel ohecha upe héravape Eliab ha he'i ipype: "Katu ete kóva hína upe kuimba'e Tupã Ñandejára oiporavóva mburuvicha guasurã".

Tupã Ñandejára katu he'i ichupe: "Ani rema'ẽ hova rehe térã ijyvatekue rehe. Che ndaipotái ichupe. Che nama'ei Peëicha. Peë pema'ẽ upe kuimba'e rova rehe, che katu ama'ẽ ipy'apýre".

Jesé ohechauka 7 ita'yra Samuélpe, ha Samuel he'i ichupe avavépe ndoiporavoiha Tupã Nandejára.

Ipahápe oporandu ichupe:
- Ndaiporivéipa nde ra'y?

Jesé he'i: - Oï gueteri upe michĩvéva oñangarekóva hína ovecha rehe.

Samuel he'i: - Ehenoiuka ichupe. Ha'e ou rire jaguapýta jakaru.

Jesé ohenoiuka ichupe: upe mitã rusu hova pytä, hesa porã ha ijuky.

Tupã Ñandejára he'i Samuélpe: - Kóva ha'e! Epu'ã emoingo ichupe mburuvicha guasu ramo.

Upépe voi Samuel oguenohẽ iñandyry ryru ha ityke'yra kuera renondepe omoingo Israel ruvicha guasu ramo upe mitã rusúpe hérava David. Upe guive Tupã Nandejára espíritu oñemomba'e David rehe. Upéi Samuel oho jevy Ramáme.

Tupã Nandejára Ñe'ẽ.

SALMO ÑEMBOHOVÁI 23,1-6

R. TUPÃ ÑANDEJÁRA CHE REREKUA MBA'EVE NAIKOTEVËI.

Tupã Nandejára che rerekua, mba'eve naikotevëi.

Ñu rovyũ asýpe che mombytu'u, y satĩ ypýpe che moguahẽ. Che mombarete jevy. **R.**

Tape hekópe guáre che reraha héra rehehápe. Ahasa ramo jepe ka'aguy ypytũ rupi, ndakyhyjéi chéne, nde, che Jára, reimégui che ndive.

Nde yvyra jekoha, che mbo py'aguapy. **R.**

Karu guasu chéve rejapo umi che rayhu'yva rovake. Che akã rehe reñohẽ mba'e ryakuã asy, ha upe hay'uha remoenyhẽ chovi. **R.**

Ne mborayhu ha ne mba'e recha kuaa, rehechauka chéve aikove aja pukukue, ha nde rópe Tupã Nandejára, aikóne opa árape. **R.**

SEGUNDA LECTURA:

ÑAHENDÚTA TUPÃ ÑANDEJÁRA ÑE'Ë SAN PABLO OHAIVA'EKUE ÉFESO GUÁPE 5,8-14

Che pehenguekuera:

Peë niko yma peikova'ekue pytũmbýpe. Ko'ágã katu, pejoaju rupi Tupã Nandejára ndive, peiko tesapehápe. Peiko aipo ramo umi tesapépe oiko háicha.

Pe tesapégui niko osẽ py'a porã, tekojoja ha añete. Peñeha'ã peikuaa mba'épa umi Tupã Nandejára oguerohoryva.

Ani pejapo umi mba'e mba'everã iporã'yva, umi pytũmbýpe oikóva ojapóva. Penohẽ uvei okápe opavave ohecha haguã. Natĩ niko ñañe'ẽ haguante jepe umi mba'e kañyháme ha'ekuera ojapóvare.

Opa mba'e oñerenohẽ ramo okápe hesakãháme, upépe ojekuaa mba'éicha ite guápa hina umíva. Opa mba'e oñemyesakãva niko oiko ichugui tesape.

Upéva rehe purahéipe he'i: Epáy nde, rekéva. Epu'ã omanóva apytégui ha Cristo nde resapéta.

Tupã Nandejára Ñe'ẽ.

ACLAMACIÓN Jn 8,12

R. Romomba'eguasú ndéve Jesucrísto. Che ha'e yvypórakuera tesapehára, upe oúva che rapykuéri,

Ndoikovéima pytũmbýpe, oguerékóma uvei tekovete rehegua tesape.

R. Romomba'eguasú ndéve Jesucrísto.

EVANGELIO

KO'ÁGÄ ÑAHENDÚTA ÑANDEJÁRA JESUCRÍSTO REKOVE HA HEMIMBO'E SAN JUAN OMOMBE'U HÁICHA. PEJAPYSAKA PORÁTAPA HESE? 9,1.6-9.13-17.34-38

Upe ramo Jesús oguatávo ohóvo, ohecha peteĩ kuimba'épe ohecha'yva oikove ypy guive.

Upépe Jesús ondyvu yvýpe, ojapo tuju hendýpe ha omona pe ohecha'yva resa rehe. Upéi he'i ichupe: - Tereho ejovahéi Siloé y no'õme. (Siloé he'ise temimondo).

Pe ohecha'yva oho ha ojovahéi, ha ou jevývo ohecháma. Umi hóga jere rupi oiko va'ekue, ha umi ohechámi va'ekue ichupe ojerure oikóvo ho'u va'erã umi oka rehe ohecha ichupe.

Ha he'i ojupe: - Ndaha'éi piko upéva ku jahechámiva upe rupi oguapy ha ojerure ho'u va'erã? .

Oĩ he'íva: - Hẽe. Péva ha'e.

Oĩ katu he'íva: - Nahániri, ndaha'úi. Ijoguahánte upéva.

Pe kuimba'e, ha'ete voi katu he'i: - Che hína upéva Ha ogueraha hikuái pe ohecha'ỹ va'ekuépe fariseo rendápe.

Pytu'uha árape niko Jesús ojapo pe tuju ha upéi omonguera ichupe. Umi fariseoháma oporandu ichupe mba'éichapa ou ohecha.

Ha ha'e he'i ichupekuéra: - Omona tuju che resa rehe, upéi ajovahéi ha ko'ágã ahecha.

Oĩ fariseo he'íva: -Péicha oja'póva ndoúi Tupãgui. Nomomba'úi niko pytu'uha ára.

Oĩ katu he'íva: - Peteĩ iñangaipáva piko mba'éicha oja'póta mba'e hechapyrãva koichagua?

Ha ojoavypa hikuái oñondive. Upéi katu oporandu jevy pe ohecha'ỹ va'ekuépe: - Ha'e niko ne monguera rehecha haguã. Ndépa mba'e ere hese?

Ha ha'e he'i: -Che ha'e hese, ha'e maranduháraha. Upéma ramo he'i ichupe hikuái: - Nde, ne renyhẽva tembiapo va'igui reikove ypy guive, piko rejúta ore reko mbo'e haguã?

Ha upepete omosẽ ichupe hikuái pe judíokuéra tupaógui.

Jesús ohendu pe ohecha'ỹva'ekue oñemosẽ hague.

Upéva rehe ojuhúvo ichupe he'i: Ndépa rejerovia Tupã Ra'y rehe, yvypóraicha ouva'ekue ko yvy ári?

He'i ha'e: - Ere chéve mávapa, ha ajeroviáta hese.

Jesús he'i ichupe: - Rehecháma niko ichupe. Che hína upéva, ko ne ndive oñe'ẽva.

Upépe, pe kuimba'e oñesũ Jesús renondépe, ha he'i ichupe: - Ajerovia nde rehe che Jára.

Ñandejára Jesucristo Ñe'ẽ.

JAJERURE ÑANDEJÁRAPE – PETICIONES

Jajerovia pype Ñandejára Hesukristo mborayhu tuichaite rehe, ñamoi oñondivepa ñane ñembo'emi ñande Ruarangatu renondépe.

R. ORE RENDUMIKENA ÑANDEJÁRA.

1. Ñandejára ñande resape'a háicha, ñande avei jahesape'a ha ñamboguata haguã ñande rapichápe, osẽ haguã pytũmbýgui ha ohesape haguã ichupe Hesukristo mborayhu. **R.**

2. Ndaikatúiramo jepe jajotopa jepiguáicha ñañembo'e haguã. Ñañembo'e ojuehe ikatu haguãicha ani jakyhyje ko jehasa asy pa'ume ha tañanembareteve jeroviápe. **R.**

3. Ñande rapichakuéra hasýva rehe. Oiméva ojararra ichupekuéra Koronavíru térã ambue mba'asy. Jaheka haguã mba'éichapa ikatu ñaipytyvõ, ha ñañangareko ojuehe. **R.**

4. Jajerure avei umi ñande rapicha omba'apóva ára ko'ere okaru haguã. Gobierno ha mburuvichakuéra ohechakuaa ha oipytyvõ haguã umíva, ani ojeheja rei. **R.**

Ikatu ñambojoapyve ñane ñembo'e...

Ñandejára Ore ru, reikuaa niko ore kangyha ha roikotevẽha nde rehe. Ore pytyvõmi kena ko kuarésma rapére, roñembojave haguã rohóvo nde rehe.

Nde Ra 'y Hesukristo rupive. Amén.

ORACIÓN SOBRE LAS OFRENDAS

Ore Ru, vy'apópe rogueru ne renondépe ko'ã kuave'ẽmby ohupytykáva pysyrõ ijapyra'ỹva; ore pytyvõ romomba'e guasu haçua ne'ërendúpe ha roikuave'ẽ haçua hekópe yvypóra pysyrörã.

Ñandejára Hesukristo rupive.

PREFACIO (EL CIEGO DE NACIMIENTO)

V. Ñandejára toĩ penendive.

R. Ha nendive avei.

V. Ñamopu'ãkena ñane ánga.

R. Romopu'ãma voi Ñandejára gotyo.

V. Jaaguyjeveme'ẽ Tupã Ñandejárape.

R. Iporã ha tekotevẽ.

Añetehápe iporã ha tekotevẽ ore rembiaporãvoĩnte ha ore ñepysyrõ roaguyjeveme'ẽ ndéve opa ára ha oparupiete Ñandejára, ore Ru marangatu.

Tupã nde pu'akapáva ha opa ára reikovéva,

Ñandejára Hesukrísto rupi.
Ha'etevoi, ojerurévo pe Samaritánape omboy'u hagua ichupe omoĩmavoĩ ra'e ipype jerovia;

ha ohechaukávo ijy'uhei pe kuña jeroviágui, omyendy hekovépe Tupã mborayhu.

Upéva rehe, roaguyjeveme'ẽ ha romombe'u guasu ndéve ropurahéivo imaragatumavakuéra ndive:

Imarangatu, Imarangatu, Imarangatu
Ñandejára, Tupã Opa Mba'e Jára.

Henyhẽ yvy ha yvága nde rekove mimbipágui.

Osánna yvágape. Jehovasapyre pe oúva Tupã Ñandejára rérape.

Osánna yvágape.

ORACIÓN DESPUÉS DE LA COMUNIÓN

Ore Ru, nde rehesapéva mayma yvypóra oúvape ko yvy ape ári, upévare rojerure ndéve ehésape ore korasõ ne remime'ẽte ojajaipáva rupive, ikatu haguáicha rojepy'a mongeta nde reipotaháicha, ha ndéve rohayhukuaa hagua ore py'aite guive.

Ñandejára Hesukrísto rupive.

JAHAKUÉVO - DESPEDIDA.

Ñandejára Hesukrísto ñane mbyaty ha ñanerekombo'e ko árape. Ha'e oipe'a ñande resa ha ñande resape jaguata haguã tape porãre.

Ñande avei jaguatávo oñondive jahesape ojupe tape ha ñañoptyvõ ani haguã ñakañy ojuehegui ha Ñandejára rapégui.

Aníkena ogue ñande hegui pe jerovia ha mborayhu ohesapéva ñande rekove, mamó jaiko hárupi.



0981 615 628



@misaguarani



misaguaranipy@gmail.com

Con el aval de:



Conferencia
Episcopal Paraguaya